


天一閣藏明代方志選刊

蘭陽縣志



305/07

一九六五年十二月中華書局
上海編輯所景印寧波天一閣
藏明嘉靖刻本原書版匡高二
二·三公分寬一四·三公分



叙蘭陽縣志

蘭陽古東昏邑當齊魯之衝
曹許睢陳之間數經兵燹邑志
久廢其尹褚子宦蒐輯殘缺邑
進士李君蒙泉遂編訂成帙予
覽而繹之乃知古之為志者厥
意遠矣夫事必有稽而後可以



立政行必有據而後可以基化
故職方所載題其綱弗竟其說
八索九丘昭示典要運用之妙
則存乎其人也今志之大者曰
疆域曰田賦曰學校曰人物古
今不易也乃若教農桑以植其
本酌徵歛以紓其力輔翼匡直

以端其趨向表暴振作以樹之
風聲是非志之所可及也况其
邑壤土平衍水旱易侵大河經
繞脩費無定民貧役重咸罔堪
命當其任者視他邑為尤難尹
能循其名以責其實通其情不
易其俗則仁愛之心自不能已

惠澤之政必有可觀如是則百里封疆之寄不愧父母之任後有作者必來取法則吾為之監司者亦足以免瘝曠之咎徒云具文詞齊物采則亦兔園之籍爾其於治化何補

賜進士第中憲大夫河南按察司

副使前兵科給事中少峯商大

節譔

蘭陽志序

前進士邑人許樾撰
邑舊無志自澹然先生始為
之然稽典獻昭軌物可信今
而詔後矣其當時令吾邑者
弗相厥載故邑人無從質之
也歲丙申碧山先生以澹然

公志畀余曰子終之余浮沉
內外餘十載矣弗克為吾友
蒙泉李子得澹然公志撮其
凡增附攸見備一家言邑茂
才楊管二生從而翼其成助
而裒且析余自晉道邑令褚
槐屏公出志求是正焉吁茲

成事也褚公惇典重紀良勤
矣夫余少取友於吾邑得蒙
泉子多聞而識余時寡陋辱
蒙泉不鄙丹鉛相就者幾五
年今觀是編可謂蓄而發乎
且志也者考故而徵實焉用
文之玉卮無當雖貴弗寶翔

其門題旣茨罔加君子病焉
據志所紀謂土間名產值湧
而棘歛厲民之階均糧制賦
地賤而不售瘠民之漸河防
奔突黠者詭災求免導訟之
原確哉論也可裨采風獨文
乎哉吁制典也人紀也邑素

於開封稱望焉方伯丘公名
德奕奕服官美政居鄉善俗
先師後渠先生贊公爲河洛
巨擘有光信史厥子澹然直
聲諫垣嗣若郭侍御之秉介
張中丞之經畧暨先伯主一
之督賦亶乎臣摹官師則若

扶風王之立荊州鄧之敏寧
海劉之毅黃巖應之化政教
咸用有章肥遯則松山文而
智麥菴暢而朗暨先祖白雲
居士篤而懿可擅林壑之秀
亶乎民表志之或詳與畧余
韋其成無以堅白爲也槐屏

公懇余言余故論列如此且
質蒙泉子以爲何如也褚公
政蹟煥乎可述追蹤前哲矣
茲不載序之成爲

嘉靖丙午仲秋月望

蘭陽縣志序

夫以九丘之編滙融群派小史之帙峭聳孤峰
是以搜神記幽俚蟲錄異其故何也披卷凝思
潛通冥府據槎縱目闊視遐方若夫嫌於脩辭
則亦艱於歷覽世隔風息地變跡荒故襄郊迷
驂御之途而魯嶽犯具敖之諱菽麥自闡瑯琊
人駭宜乎叅軍昧於馬曹宰相情於錢穀矧能
諳故實提酬對哉嘗觀食貨藝文貢賦學校律

曆選舉禮樂兵刑紀事惟鈞名志相襲匪直地理則然也若迺我

朝之志一統以括輿圖一省以析藩臬一郡系乎州縣一同殫乎封疆繇是曠世閱在比肩絕域知不出戶詎匪亮哉肆我蘭陽舊志始纂於王氏者若踈嗣輯於張氏者或泛惟丘澹然先生所著既兼三長復包衆美惜也未壽之梓顧乃遂散其章秦漢迄今之典幾淪於蔑矣然而殘

編斷簡尚可添注甄收豕亥銀根罔辭贅革郭
公夏五姑示疑訛獵善稽之鄉評拾遺諮之耆
舊情惟真率言弗彌縫翦削繁蕪雖執臆見提
撮領要實祖前脩於戲僭矣錄成顛末涉徧古
今其於諸志則與有力焉脫有問者僅足以答
其槩也所憾者四境平原乏巒壑之登眺十終
禾黍罕林泉之勝遊譬則玄酒太羹人罔不厭
其澹亦罔不齊其腴又如太呂黃鍾人罔不鄙